



聖宋名賢五百家播芳大全文粹卷六十二  
賀啟



賀周守啟

孫正之

伏審傾北海之賓嘗分光於一日擁東方之騎亦均  
覆於二天眷幸會之非常喜餘生之有託恭惟 某  
官先賢世胄今代人豪公瑾之英烈尚存伯仁之風  
流未泯百年垂裕千里蒙休輟神館之清資付專城  
之重寄羣兒爵躍已大喧騎竹之迎一老龍鍾猶能

進拔薤之隱即諧瞻拜但切欣愉

賀江守啟

邵懷英

伏審丐便親闈就臨郡紱優游戲綵無道途數舍之  
勞寬大頒條有井邑連墻之便蓋特隆於簡注容自  
遂於懇私卧鎮之初歡謠載洽恭惟 某官才周物  
表文擅國華丹宸赤墀自結知於明主紫薇青瑣殆  
歷試於華途迺退託於陔蘭更戀瞻於鄉梓囊封屢  
上彌孰養志之求宸翰載頒特畀專城之養山川不

改閭井如歸指丘水之舊游動旌旗之喜色某昔嘗  
瞻望今復親依賈誼奏篇叨與刪修之末齊風報政  
仁觀課最之先禱頌深深叙陳曷既

賀胡守啟

汪聖錫

伏審顯陞內閣申總邊城遯聽慶音良深抃悃恭惟  
某官懷材瞻敏稟質忠純蚤馳當世之聲猷果契  
有為之事業虎韜豹略師行樽俎之間鐵瓮湯池勢  
逼擅裘之外遠夷響動黠虜氣殫峻功因儒帥之謀

寵數協士林之望某方修慶禮遽辱謙滕遐企麾幢  
第勤心目

賀游守啟

王德立

十行鳳詔起謝傳于東山千里虎符屈召公於南里  
何幸儒業之復用庶幾民瘼之必瘳道之將行喜而  
不寐恭惟 某官天民先覺王國耆英隱然形大以  
聲絃凜若芒寒而色正高明之學孟荀真王者之師  
康濟之功伊呂乃聖神之偶早逢熙運徧歷華途大

節當堂不為雪霜而改操丹衷皎皎代與日月以爭  
光中心不動於一毫外物何憂於三黜願陞辭之已  
久注宸眷以彌隆果奉綸言亟分侯服矧楚尾吳頭  
之地據閩商粵賈之衝觀閣鱗差江山秀列凡領承  
宣之寄元非偉傑之才帝曰汝諧卿為朕往先聲所  
至草木已知於威名和氣頓為桃李爭妍於春色擁  
雙旌而肅引騰五袴以謹謠岳牧止用於詞人遠邁  
唐朝之故事刺史入為宰相行看漢札之新頒某遠

寓邊陲欣聞郵命願掃門而莫及悵賀厦以無階五  
馬贊書可慶人生之貴雙魚委質輒修堂下之恭慶  
抃交孚敷宣因旣

賀梁守啟

孫仲益

四海聲名夙著宗儒之望一時人物獨高政本之科  
方資共理之求允屬承流之寄恭惟 某官勞謙下  
士居簡臨民明哲王之蓋臣豈弟古之循吏擁東方  
之騎已大慰於遐瞻憇南國之棠宜少留於高躅睹

二天之風采溢千里之春聲自憐投老之餘獲在容  
光之地繫大賢之高致奚弃先游厠賀客之下寮自  
慚末習

賀張守啟

范西叔

竦聞譽命光奉恩綸解印陝郊作藩楚服伏深慶慰  
恭惟 某官學通今古識際天人遇事敢為直躬无  
愧風生芸閣皆名理之談鶚立霜臺有忠義之色恥  
遂容身之計勇為去國之行列郡澄清蕭然虛囿斯

民饒富浩若流泉俯臨大國之封遽報暮年之政益  
隆宸眷更守名邦浮鷁清湘聊遠江湖之興懷鉉紫  
禁行追翰墨之游公猥以塵蹤竊攀英躅石渠舊事  
嘆從宦之飄零銅虎優恩期望風於髣髴方謀命駕  
先辱飛騰竝申伏謁之勤少慰叙陳之願

賀韓守啟

葉之望

黼座疏恩朱藩出鎮輟元侯之千乘布溫詔之十行  
人望翕歸王靈其渥切以閩邦勝壤建水上游自昔

揚州之故區上直星紀之分野江山如畫列武夷之  
洞天地望最雄控東甌之襟帶密邇九重之行殿宛  
同三輔之陪京自非五百年名世之流昌稱二千石  
惟良之選恭惟判府左司直閣智周物表道覺民  
先吏部文章擅二百年之聲價荊州風采過一萬戶  
之侯封傳家獨擅於典刑入仕早符於際遇險夷歷  
試中外踐更旋躋宰屬之榮繼寓秘圖之直特賀簪  
筆盍處禁嚴擁纛建牙暫司屏翰蓋聖朝之重外本

守臣之得人先聲初下於斗南和氣頓回於閩嶠京  
師蒙福已觀郭伋之行朝廷深知即慶弱翁之名某  
劔津賤士錦里負丞慕義何啻於十年庇身幸佐於  
百里槐松對植敢矜除水之鳴荆棘雖微亦冀慶雲  
之福恢胎在候景物漸舒仰旌旆之在途擁休祥而  
來舍冒懷所蘊筆舌難窮

賀宋守啟

朱子履

伏審光膺奉詔榮剖虎符見一人眷倚之隆為千里

生靈之福吏民交慶遐邇均歡恭惟 判府朝議神  
清氣和量洪德厚儼日角珠庭之人物傳瓊盃玉斝  
之家聲早拔周行茂膺異眷踐更中外之久備見設  
施之良分麾已報於政成上計亟聞於詔可薦領承  
宣之寄用分宵旰之憂浙水雲愁人結去思之恨閩  
山風動衆興未慕之謠將聆精騎之戒途竊恐絲綸  
之從召入綴鷓鴣之列即依日月之光某濫籍官聯  
素餐屬邑託二天之庇望有甚於雲霓賀大厦之成

情豈勝於燕雀

賀程知府啟

朱顯叔

輟從祠館更殿侯藩上知甚明物論斯快凡賴悒悒  
之庇尤深抃躍之誠仰惟 判府徽猷道德淵源文  
章宗伯回狂瀾於學海聳巨幹於儒林偉程氏之家  
聲為伊川之名世典刑具在風采凜然雖擁纛建牙  
易司屏翰而特荷簪筆將處禁嚴藹與頌之甚休慶  
邦人之攸繫某江湖冷族章句陋儒側聆綸綍之頒

屬在部封之末將諧望履欣遂執鞭願伸拜下之儀  
式慰仰高之僚諒旌麾之所指宜神物以來持倍擁  
殊祥允符瞻詠

賀葉守啟

許仲賢

暫違省掖出守淮壖阻奉訊音積馳係想伏惟 某  
官富有道學奮為人文直前疑危自信剛大三已而  
无愠色是有子文之仁四十而不動心真得孟軻之  
勇行聽嚴召用副衆言公先沐芳騰第深愧感



賀王守啟

陳師益

睿主勤賢思得人而共理  
宣侯體國即拜命以承流  
久傾慕藺之情茲快識韓之願  
恭惟判府提舉中  
大器資博大材術優長  
浴德澡身外絕可磨之沾涖  
官行法中懷以直之剛  
將使指以觀風肅豪強而斂  
迹宸衷簡在儒術盛行  
當運開千載之期享人生五  
馬之貴才應鳳星之瑞  
名彰鷓鷯之行尚枉朱輪  
竝翻紅藥公磨鈇策鈍  
竊食偷榮隱居以求幾欲  
栖蹤

於少室為貧而仕頗慙尸位於藍田何期苦節之踈  
頑獲倚甘棠之蔭樾欣然有喜言之不文虔修燕賀  
之誠後遂覓趨之幸瞻依政切敷叙莫窮

賀薛守啟

蒲子復

伏審光膺帝渥寵寄侯藩乃江浦之輿區實京華之  
近地自頒綸綍喜溢搢紳恭惟判府右司德望俱  
隆才華甚茂夙挹孔周之學出逢堯舜之時簡在淵  
衷屢膺顯擢優居星省徊翔久歷於歲時出奉虎符

平理尚資於德政用副九重之意計安千里之民使  
无歎息愁怨之聲宜有和易優柔之化且即官上應  
列宿咸仰循良然刺史入為三公位觀褒顯公自惟  
寒賤久辱眷知聞除命之既傳激愚衷而倍喜敢憑  
竿牘輒伸燕賀之私遐企門牆徒極斗山之仰其為  
贊詠固罄敷陳

賀曾守啟

張守道

屈臨藩方小試才具視印章於剛日下條教於遺民

父老交歡士友同慶恭惟 某官才華世濟學術家  
傳博涉古今久擅縉紳之譽踐揚中外早膺廊廟之  
知未究遠猷姑從祿仕雖淮西之偏郡寔江左之上  
流疆場粗宣政假綏懷之畧瘡痍未復尤資惠愛之  
之思想耕桑之業俱還而襦袴之謠並起班春擲簡  
追健筆於東坡瀝酒叩舷弔英姿於赤壁一洗積年  
之沉滯未妨他日之騫翔佇治最之上聞即華塗而  
入踐某久叨事契每嘆淹回逃聞下車殆將折屐莫

遂門闌之慶首貽竿牘之榮欣幸之私敷言固既

賀梁守啟

趙承之

顯膺成渙易鎮近藩左史記言暫輟論思之益大邦  
維翰寔分憂顧之勞盛德所加傳聞相慶恭惟某  
官遠猷經世雅望映時上林子虛秀發岷峨之氣春  
秋洪範相傳父子之書方公道之恢張首衆賢而召  
見紬文虎觀遙觀四部之新載筆螭蚘曲盡三長之  
妙密勿公言之地從容侍從之班敢意江湖獲瞻鵷

鷺淮陽暫屈在汲黯以何傷馮翊既更抑望之之將  
用矧乃賜環之意兆茲換節之榮坐恐憇棠不容暖  
席某晚生墻面孤宦陸沉想前輩之風流莫傳師友  
誦名臣之事業殆若神人乃當大府之開猥廁附庸  
之列行其所學雖莫逮於絃歌奉我覓條尚不專於  
刀筆

賀王倅啟

虞智周

伏審光膺渙號榮貳雄藩消日之剛已諧洗視順風

而請深切依歸恭惟 某官韻宇儲崧高文倒峽智  
能周天下之事書不工紙上之言入碧海掣鯨鯢其  
已久矣上青雲跨駉駉尚且遲之姑倅貳於郡符已  
喧騰於朝望山川改觀風月平分千里題輿宣久屈  
屏星之駕九重側席將促近北辰之居不待突黔即  
膺泥紫某質顛性室才散慮踈偶濫竊於儒科顧繆  
當于邑寄傷多製錦真有索塗才已匱於一同考書  
下下仁鼎依於半刺喜溢津津影欲避於鴈行屢敢

稽於燕賀屬緣掌綴莫獲親承貢彛禮於緘滕願慚  
柔訥遡餘光以墻仞第劇戰兢冬律向邁寒氣无力  
敢旬節宣之善茂迎戩穀之繁心曲所期筆端奚竟  
賀陳倅啟  
虞智周

伏審祇承休命榮貳雄藩千里庇休一時鼓舞恭惟  
某官行方以峻德粹而溫精窮學問之淵源自立  
文章之機杼酬酢世變以時中之義混融天理於日  
用之常首善京師風光壁水同流王化來駕屏星姑

試題與即膺前席居之无幾暫遠城南尺五之天進也未央將到蓬萊方丈之地某質顛性室才散慮踈偶濫竊於儒科顧繆當於邑寄歲麾月費甚慙鼠竊於太倉晨入暮歸第見駒馳於空隙雖弊筋力何補毫毛會逢賢德之鼎來尤慶微蹤之有託何其幸也將披宿霧於公堂又有甚焉願借餘波於君地寸心所蘊尺牘奚周

賀龔倅啟

晁子正

紫詔疏恩倚諸老先生之重黃堂貳政膺治中從事之榮凡庇餘光舉深抃素切以朱幡皂蓋承宣雖寄於專城泥軼緹屏開決是繫於別駕矧邛山之舊地號蜀土之名區筦權浩繁簿書紛委不有耆英之望孰知政理之良恭惟某官道會性天學優聖域圓明妙湛契古佛不傳之心變動周流窮伏戲未畫之易踐揚撫仕藹著能聲暫淹持索之榮茂對題輿之寵濁賢清聖舊聞隱吏之風流白叟黃童尚識故侯

之面目佇瞻旌旆仰託悒懔公庇職无能以身得察  
莫從侯吏躬負弩於前驅行與諸生俱執經於函丈  
其為欣抃罔究編摩

賀魏倅啟

周行可

疏恩玉殿半刺金城邸報所傳輿情惟悒况悒懔之  
所逮尤鼓舞以知歸恭惟某官器略宏深風猷秀  
整凡周旋當世之務皆從容適時之才當宁眷隆欲  
共濟中興之舉題輿望重姑試觀開決之能歷數前

世之英雄多由此塗而施設矧茲潮郡自昔瀛洲嘉  
禾宛然韓昌黎之舊德豐碑屹若陳文惠之高風允  
籍鴻才庶攀懿躅穎方自露展驥足為海隅席想未  
溫來鳳書於日下顧茲冗品幸屬下風特遂鳧趨預  
深雀躍

賀王倅啟

楊成功

芝封紫詔久傳半刺之除魚置尺書莫展一言之賀  
况江山之有間望履烏以无因仰德滋深撫躬積愧

恭惟 某官職該今古學貫天人蚤空蟾窟之枝旋  
浴鳳池之浪盤根錯節知投刃以皆虛聳壑昂霄遂  
干雲而直上即見題輿之譽遠追康海之功計未席  
溫已聞詔入某鼠窮見易鉉鈍奚堪昔已幸於登龍  
行復欣於附驥謹同百姓再興來暮之謠更冀一身  
獲賴存全之惠春規道暮德宇夙遙伏祈上為邦家  
善雖福履其為頌詠曷罄敷陳

賀饒倅啟

李知幾

仰膺宸檢半刺侯藩惟茲舉國之公評允屬題輿之  
重望光聲所暨衆志攸歸恭惟 某官學術淵源天  
資醞籍聲名聳縉紳先生之觀議論有君子長者之  
風當年芹泮之師儒漸摩有素此日棠郊之別乘關  
決尤長坐席未溫召函已促某鯁生何幸鴻庇是依  
將遂鳧趨尤深雀躍

賀張倅啟

鄭厚

仰膺成命半刺巨藩贊美政於中和試長才於闕決

先聲所暨公議攸歸恭惟 某官學有家風才推國  
器用无施而不可治所至而有聲望重題輿試展夷  
途之驥足眷隆當宁行陪禁掖之駕行自顧萍蹤行  
詹芝宇

賀李倅啟

何子固

公朝重外聖主憂民輟樞府之要津貳海濱之遠郡  
先聲所被闔境交歡恭惟 某官學術深醇文詞典  
麗詩書傳美夙高翰苑之風華萼連芳繼擢詞科之

貴橫身學省提槩道山涵器業以加修養名聲而益  
廣顧時芳右武徒誇述作之工雖地峻本兵猶滯編  
摩之職謂當迅用更此外遷諒无暖席之安即被賜  
環之寵 某榮同解褐進類簞精從伯仲之游幸朝  
變之接武申子孫之契喜別乘以同寮將蒙刺於剗  
裁庶偷安於嘯諾米鹽不給老子之興无多風月何  
殊賢者之樂有待其為忻幸難具敷陳

賀諸葛倅啟

熊子復



伏審中疏一札外贊六條以卧龍宗派之華由展驥  
仕途之捷雖仲舉明輕別駕未愜壯懷然武夷陰護  
曾孫仰駐仙境恭惟 通判寺丞世傳今德身負竒  
才鄉士升司徒掇衰然之舉首國子入太學掀籍甚  
之能名扁睿智之有臨憫文獻之不足使謁者而求  
遺書於天下得先人所藏古文於壁中悉送上官皆  
充秘府既助興於緝典宜祇奉於渥恩驟逢特達之  
知早免徒勞之任入聯棘寺法推廷尉之平出貳棠

郊政持刺史之半龍檢即聽於嚴召鵷行更覩於榮  
登某鄭校小生梁園下客栖栖者非為安也誠慕是  
邦之賢大夫休休烏寔能容之願進吾黨之狂小子  
賀連倅啟

鄭元嘉

恭審雲外鳳書光被九重之渥湖陰泥軼榮分半刺  
之權涓日頒條順時宣化伏惟慶慰恭以 某官先  
生材猷敏邵聞望高華秀氣逼人飄逸一枝之桂冲  
懷灑落汪洋萬頃之陂允矣棟梁之材温其瑚璉之

器茂承脣眷踐歷要津姑藉盛名暫題輿於方面惟揚茂績終持橐於禁林德業定期於遠圖功名蓋出其餘事某祖本移澗身生益陽徒知誦詩而讀書未能出囊而脫穎敢言萍蹟濫玷宗盟欣承視印之初倍切懽心之積賓墀稱賀已瞻大廈之成黌舍偷生全恃慶靈之庇

賀王倅啟

李子西

伏審詔下日邊逖聽疏恩之渥邦臨湖右咸瞻半刺

之榮光耀縉紳懽傳道路恭惟通判學士行應人傑才稱世師清節照時注玉壺之沆瀣高文華國垂金薤之琳琅暫淹展驥之馳終副佩刀之贈无施不可所至有聲恐未及於下車已別聞於出綽某顧漸樗質謬綰銅章比從邸報之傳亟動心旌之喜晉卿愛日將遂借於恩光少室景星行可期於快覩江鄉歲晏門館天遙倍希遵繕之宜益厚穆清之眷茲烏抃頌无以喻云

賀龔倅啟

史鴻漸

伏審制出中宸通虎符而共守權居半刺展驥足以  
猶淹除目初傳輿情胥悅恭惟 府判學士心澄玉  
海學富金籟大策高文昔貴都城之紙仁恩善政屢  
陰召伯之棠尚虛持橐之班俯就題輿之任未溫坐  
席行趣歸裝某檇櫟散材蓬蒿倦翼識迷朱墨敢辭  
簿領之勞目極雲天即仰帡幪之廕迹阻匏瓜之繫  
心馳燕雀之誠忻喜載懷名言莫既

賀范倅啟

費原父

伏以芝緘疏寵榮膺別乘之除泥軾臨民爰貳价藩  
之重傳聞攸暨忻懌惟均伏惟 通判學士閱識會  
元英猷體遠蚤飛英於桂籍旋振武於花封物情曲  
衍而周知吏事彌精於緣飾雖兼長之屢試亦素蘊  
之未攄刺史題輿俯慰一圻之望侍臣持橐行陪三  
接之榮某仕也為貧師哉何補幸瓜期之甫及望宇  
蔭以猶賒歲律崢嶸物華婉晚願謹節宣之理益崇

願衛之宜忻頌之私敷陳奚究

賀虞倅啟

崔子淵

中疏一札外贊六條泥軼來臨動溪山之秀氣樵城  
相慶載道路之歡聲伏惟 某官氣宇靚深性質輝  
厚蚤飛馭於華旦存騰踏於夷途別駕辟於陳蕃暫  
屈雲霄之步宣室思於賈誼仁承雨露之恩某自昔  
聞風尚遲識面將繡衣之直指甚愧非才啟白絹之  
斜封益欽厚意

賀張倅啟

熊子復

伏審疏榮宸檢闕決藩條喜催龍劍之還愧魚緘之  
貺竊以廬陵送行於北固詠江山之最嘉眉陽得侶  
於西湖謂風月之分破恭惟 通判朝議受才庸敏  
造理精微波瀾文自老成緣飾政皆儒雅題仲舉之  
座方著於令名賜建武之書即膺於嚴召某猥叨郡  
寄稔聽鄉評所求乎先施未能過勤妙語匪報也永  
以為好用贄鄙辭

賀胡倅啟

周茂卿

伏審光膺宸檢榮貳藩條方閱次以及期即涓剛而  
赴治凡居按察預切欣愉恭惟 府判判院學有淵  
源文知體要自偶休明之運已深簡在之知錯節盤  
根迎刃而解良金美玉為世所珍覺富貴之逼人付  
功名於餘事乃眷梅仙之境暫丞竹使之符治優贊  
於循良政每資於闕決預慶偏州之蒙福咸欣半刺  
之得賢然州縣徒勞人寧久淹於外補而台相先遠

業行即慶於褒除某賦性凡庸受材鬼瑣雖便便而  
唯謹徒斷斷以無他濫綴官曹叨為邑佐自始聞於  
成命尤切倍於歡悰燕集雕梁已有依棲之便馬居  
華廡尚希眄睐之私願伸拜下之儀式慰仰高之僚  
諒旌麾之所指宜神物以來持倍擁殊祥允符瞻詠  
賀王倅啟

朱廷珪

榮貳使車光明鄰境假符刺舉實瑞表於郡察贊職  
蕃宣迺同流於王化風聲所暨驩誦載颺伏惟欣抃

恭以 某官植德粹溫受才明敏譽高華胄惟有之  
是以似之業紹真儒在賢者識其大者聊攄底蘊式  
著翱翔允敷惠於一方即飛英於百越肯從別乘無  
煩題仲舉之輿使處治中佇見展士元之驥未遑煖  
席應有除書某叨守邊陲匪遙賓紀木受繩而金就  
礪阻切奉於良規石韞玉而水懷珠願少希於餘潤  
瞻依有素取述奚殫

賀韓倅啟

趙承之

光膺睿制榮貳雄藩屈遠步於再臨任雖圖舊聞餘  
風而相慶命則維新恭惟 某官厚德在民高名映  
世青箱肄業有七相五公之傳黃卷策勲必三代兩  
漢之作蚤注虛懷之眷屢宣寔試之勞乃以別車薦  
更名郡恩波所浸江湖猶記於昔遊遺愛宛存父老  
能談於故事雖用賢之未盡抑重外以為深坐觀海  
沂之康立還宣室之名某塵埋俗駕景仰下風濫陪  
墨綬之行獲奉屏星之耀靈河布潤尚霑九里之餘

大厦告成與有千間之慶

賀王參議啟

洪廷卿

伏審中疏華渥外贊雄藩徒御鼎來猶未披於樂霧  
緘滕驟至乃先拜於郇雲士林交歸帥閨增重恭惟  
參議直閣受才傑異造理精微故家台輔之榮世  
臣非謂喬木早歲甲科之擢學者仰如泰山共知冀  
北之空猶歎周南之滯閩包七聚率總十連佐方伯  
而領諸侯暫評婉畫媚天子而維吉士佇侍禁途某

猥被使令獲聯職事切慰仰高之久尤欣借潤之多

賀黃參議啟

林少頴

顯奉宸俞密叅帥畫聞鳴騶之載路覺制閩之增輝  
恭惟 某官識度高明器資宏廓蚤被聖神之眷屢  
更中外之勞茲膺簡迪之求來助撫綏之政庾公之  
在幕府寔為王儉之光昌黎之從辟書姑以中立之  
重佇聞環召入踐禁塗某久仰高風欣聆新命貽書  
見及大荷自牧之謙修謁未遑第深不寐之喜

賀謝參議啟

林少穎

疏恩外閫密參籌畫之奇抗轡修塗行遂瞻依之幸  
先聲所暨輿頌惟均恭惟某官沉靜有謀詳明知  
務无施不可用屢試於盤根所至有聲固已恢於餘  
地尚淹時望來贊帥藩處以優游帷幄之中略其期  
會簿書之事益觀涵養佇即召除願馳慶之未遑辱  
飛緘之先逮載惟謙眷良激感悰秋律方深涼飈浸  
肅冀此寢興之節式符企詠之私

賀劉參議啟

林少穎

肅奉宸恩榮參帥畧先聲所暨輿論攸歸伏惟慰悵  
恭以參議智通幽顯識洞古今高名聳乎搢紳遠  
謀見於樽俎顧聞風之久嗟識面以何遲方欲修  
誠遽蒙損翰驅馳原隰尚有阻於披雲引想旌麾即  
當求於發藥益增傾向固既敷宣

聖宋名賢五百家播芳大全文粹卷六十三終



聖宋名賢五百家播芳大全文粹卷六十四

賀啟

賀漕司趙主管啟

周必舉

伏審疏榮中宸參畫外臺四乘鼎來方期披於樂霧  
雙緘寵及乃預捧於郇雲恭惟 主管朝議與學根  
經雅辭貫道內剛方而不撓外廉靜以無華朝路聯  
輝有鵠原之難弟世科擢秀生鳳穴之好兒卓有令  
名蔚為盛事回翔滋久緼藉彌深輓粟飛鳥聊贊木

牛之運懷鈞抱槩即陪金馬之遊某猥假守麾獲陪  
帥屬式慰仰高之久良欣借潤之多

賀漕司王主管啟

朱茂德

伏審光膺宸寵榮贊糟權視篆云初聞風增抃恭惟  
某官器識宏遠襟度坦夷家傳高談塵之風流世  
望仰夢刀之威重符彩已標於世瑞聲稱夙擅於月  
評挺碧梧翠竹之材見璞玉渾金之器外臺參畫雖  
未究於設施中宸求賢當別膺於除召某猥塵仕路

叨貳郡條聞台旆之鼎來搖心旌而倍喜首辱飛文  
之寵益銘謙德之光

賀漕司周帳管啟

張德輿

伏審疏恩中禁贊畫外臺願修敬之未遑迺飛文之  
先辱恭惟某官詞林擢秀藝圃騰芳家聲高赤壁  
之勲人物重青雲之器識高明而自得量恢廓之有  
容踐揚蜚仕路之英蘊藉簪朝紳之望暫淹漕幕雖  
未究於設施適奉宸綸當別膺於起擢諒無溫席行

即促裝某叨貳藩條不閑吏事每恨聞風之久未諧  
披霧之因敬達柔緘仰謝先辱

賀漕司馬幹啟

揚子然

伏審入奉帝俞出隨使指束越裝而在道陟閩境以  
之官先聲所臨公論咸屬恭惟 運幹學士神鋒映  
俗仙格邁倫故家元重於典刑今代獨高於文獻匪  
謂國之喬木以有世臣尚愛公之甘棠而况其子減  
孫于魯必有後繞朝在秦豈無人從事外臺姑贊木

牛之運奏言前席佇連金馬之班某猥以非才謬茲  
假守雖宦塗之新遇然姻黨之舊聯折白絹之封坐  
驚雲翰揖紫芝之宇行款風姿

賀倉司張幹啟

胡仲達

伏審疏恩中宸贊畫外臺都騎鼎來將遂披於樂霧  
朋緘寵寄乃預拜於邨雲恭惟 提幹朝議性質靖  
深才資閱遠蔚有令望播于清時原隰皇皇暫出陪  
於使部省臺衮衮即進擢於公朝某猥布教條方親

名理式副仰高之久良欣借潤之多惟心所懷匪面  
烏旣

賀憲司呂幹啟

周季茂

伏審光膺宸檢叶贊憲臺望夙著於公平下舉聞於  
抃蹈恭惟 某官生資渾厚抱德醇全以大丞相流  
慶之賢佐部刺史宣風之寄分行郡國諒無濫罰之  
寃贊理條章當著輔成之績廣聖主好生之德懷君  
子近厚之心雖未完於設施已足明其惻隱園扉鞠

草行與有功西掖判花姑惟少待某聞風鄉也披霧  
邈然茲承騎氣之鼎來首辱書函之下逮占辭叙謝  
涉筆奚周

賀憲司檢法啟

黃廷秀

伏審光膺宸綍榮贊憲臺詳研丹筆之文益重清時  
之選見聞所暨歡抃惟均恭惟 某官體被中和才  
周果藝勤勞州縣不徼當世之知練習憲章多傳通  
儒之議比簡平反之望出陪直指之行紙上深文快

掃煩苛之弊毫端陰德自為富貴之符某猥以窮途  
將承餘映倦游半世方嗟舊事之空妙札五雲竊喜  
新知之厚

賀胡錢監啟

熊子復

伏審祇奉茂恩榮司清職束吳裝而在道陟閩境以  
之官先聲既傳公望咸屬恭惟 知監學士神標凝  
峙仙韻粹清飛翔盍寘於京華留滯尚居於莞庫乃  
眷長安之錢掾寔隸上林之鍾官聊發新硯詎勞餘

刃周園九府會見充盈漢札十行佇聞褻擢某猥游  
郡幕獲比官寮惟心所懷匪面烏旣

賀坑治司朱幹啟

陳建中

伏審光膺宸檢榮佐臬司凡預併蒙舉增欣抃恭惟  
某官丰姿秀整器識宏深棲烏傳揚府之家聲佩  
印仰錦衣之世望風采已標於人瑞名稱夙擅於月  
評躋仁路以踐揚聳朝紳而推重鼓鑄一路式資贊  
畫之功陵厲九霄當被褒除之寵遙羽即班於鷓鷯

致君肯會於風雲某濫竊儒科叨承邑寄徒弊筋力  
何補毫毛自慙頑質尚資陶冶之功敢贄尺書敬布  
依歸之意

賀總管司王幹啟

王履道

伏審中宸疏恩外臺贊畫有識交頌不謀同辭恭惟  
總幹幹議古學精深天材挺特議論得古人之醇  
正文章追作者之規摹出自相門雅為人表薦更撫  
仕藹著休稱家藏三萬之牙籤已擅書林之富世有

千尋之玉海更韜儒者之珍暫陪幕府之宴談即邁  
朝簪之班列某猥叨聯事將幸接辭懷蕙葭倚玉之  
慙願希借譽丐瓦礫成金之賜當藉包荒頌詠之私  
敷宣罔既

賀陳教授啟

王志夫

順流而行東海曾獲望洋拄笏而對西山將聞致爽  
適茲馳想遽辱貽書伏惟某官驚座雄文卧棲逸  
韻不事一室亶為有用之才將出六奇以佐太平之

運暫采芹於絳帳即分燭於青藜某碌碌尸官拳拳  
慕義念旃蒙作噩之歲曾識面於荊州而單闕執徐  
之年復同寮於士會永言欣幸莫罄敷陳

賀徐教授啟

周少淵

分職儒林下車鄉校高名夙著多士相歡自昔人昧  
五常之原而後世無三代之學大道殫殘於秦法衆  
言蔽亂於漢儒以公羊為賣餅之家蓋譏淺俚謂太  
玄可覆醬瓿尤病支離國家崇飾儒師發明道德排

異端之戕賊歸妙理之淵源必先因性而治身然後  
事君而成物故於教養益重選掄伏惟 某官德性  
靜深天材秀擢非先王之言不道以大人之學自修  
將超步於紫垣暫棲遲於泮水金口木舌一坐盡傾  
白日青天衆人皆仰鳴絃盈耳投屨滿門從善若登  
並席幾四科之列聞風而作擔簦多千里之行禮義  
相磨英豪輩出將見東徐雅俗共陶闕里之餘風正  
觀名卿半出汾陽之高第行須嚴召踐別要津慕服

素深瞻承良幸

賀王教授啟

王叔珪

槐市聞風未識元魯山之眉宇蘭陵取友欣傳鄭博  
士之才名瞻際非遙夤緣甚幸恭惟 某官莊鵬奮  
翮崑玉凝姿蜚學海之英拔穎每先於多士廣詞場  
之勇奪標迨遍於諸科暫分泮水之芹即邁昕庭之  
鷺某濫承友郡無補縣官愛莫助之方深憂於王事  
吾知免矣將得見於善人矧先十部之臨益重寸心

之感

賀陳教授啟

鄭之望

千室之邑使為宰方虞製錦之傷一卷之書必有師  
喜有摳衣之幸豈特陪銀袍而鼓勇且將觀壁水之  
增輝恭惟 某官學無不通文皆自得辭源浩瀚一  
時爭慕其才筆陣縱橫諸公無出其右游戲示工於  
三昧笑談連掇於兩科煥乎經緯之雄詞喧然膾炙  
於衆口聊居領袖未究規模招諸生立而誨之未見



三鱣之効祉則先生自此陞矣佇觀一柱之擎天某自愧塵埃日縻丹墨未能擁被聽朝衙之鼓徒勞戴星肩夜出之輿誓一洗於胷襟莫飽聆於謦効且小以成小大以成大學者孰不傾心然見所未見聞所未聞小子願安承教

賀黃教授啟

晁子淵

伏審薦掇巍科尚淹重席當多士應賢書之歲忽先生臨侯泮之時伏惟某官擢秀橋門飛英藝圃眷

二狀元之鄉曲素懋斯文繫一真儒之範模來迪後進欲試青雲之步姑橫絳帳之經士雖得有道而正焉上念何相見之晚也某顧慙假守獲並英游佇聆絃誦之興一洗簿書之冗茲為幸會將事從容

賀游教授啟

張欽夫

疏恩北闕分教南邦出御史之名門先聲已著群諸生於泮水講席方嚴恭惟某官文采飛英豈弟從政蓄於平素既以致遠為心見於施為常有躬行之

實念此都會夙多俊良正資教養之功庸底作成之  
盛識其大者豈誦說云乎哉何以告之亦仁義而已  
矣某一違風宇三易歲華忻聞徒御之臨首拜牋辭  
之辱自慚短翰曷報塵渠即聽令名少慰孤陋

賀陳教授啟

熊子復

伏以神標挺出夙冀歎於風姿僊馭鼎來顧枉貽於  
雲翰審韶光之駘蕩諒行色之雍容恭惟 教授正  
字奧學根經懿文貫道才博通於世務譽卓冠於時

髦傳道魯侯之泮宮未妨遠業校文老氏之藏室即  
被新除某猥假一麾過勤雙牘寸抱第增於搖曳尺  
緘聊附於回翔

賀鄭簽判狀元啟

楊廷秀

幕府粹清不妨尋東湖西山之勝江城踈遠未應屈  
石渠天祿之英或謂其羈離而愁思夫豈緣中外而  
欣厭恭惟 某官以海內寡二之學收天下第一之  
科舉首子大夫之中蓋今日之董相誦言諸宦寺之

輩乃登第之劉蕢奏篇一傳紙價十倍何止意驟用  
而不可猶舊章相襲而或拘翩然斜飛來此外補民  
豈無瘼正恐非在位之敢陳公於是時力行其所言  
而孰禦必能條白以次罷行上禪仁賢之主人下慰  
歡呼之父老六月之息鵬背未必其然十年而到鳳  
池故應未晚某自知其拙世指其狂少也勃乎欲竟  
造古人之處今而老矣聊坐觀半世之非周章折腰  
瑟縮掣肘宦情寂歷冷於飄落之江歸夢紛紜空遶

菊荒之徑敢圖貧病之末路烏依蔭映之餘光

賀葛簽判啟

周元吉

伏審首充賓幕光贊守麾九里之潤旁霑方依庇賴  
五朶之雲下貫尤認謙冲屬徒馭之遽臨顧緘滕之  
未具恭惟 簽判朝議神標凝峙僊韻粹清仲尼顏  
閔之傳妙臻名理太史莊騷之作深達典刑氣節凜  
然聲華藉甚持紀綱於上郡暫屈壯圖聯步武於中  
朝佇膺殊渥某浸鄰衰境猥試冷曹直諒多聞既仰

淵源之學中和樂職尚賡標準之詩

賀李簽判啟

胡子才

伏審光被恩章寵遷郎秩曾未馳於柔牘乃先枉於  
榮緘厚意所隆感懷殊劇恭惟某官風徽端雅襟  
誼粹明早揚歷於宦遊固聳傾於輿論郡條闕治嘗  
歌敏贍之才賓幕參謀重屈優長之晝即傳顯詔別  
陟要塗惟清履之順綏庶真祈之默契

賀詹察判啟

劉夷叔

屈從郎選來佐郡條慨吏役之繁興似非所處想儒  
者之緣飾終自不同伏惟某官學窮淵源器有防  
檢早策榮於昭代思騰茂於要津追計平生已宜在  
金馬石渠之地何期萬里尚能為紅蓮綠水之游雖  
雅量固已安之要朋論不為快也某老且隱去貧為  
祿來雖客嘲揚子雲之期自期不解於魯得柳下惠  
而友孰患無從願勤跋涉之勞少慰後瞻之意

賀石察判啟

李西美

伏審選自銓曹隸于藩幕首贊二天之制先蒙十部  
之貽仰認謙冲俯憐遲鈍伏惟 察判朝議英姿邁  
俗清望映時嗣文獻於故家追典刑於前輩聲華藉  
甚氣宇浩然大府之會才能整煩小試本朝之進英  
雋即被新除某猥貳郡條幸私僚茫愧未能於訊牘  
辱先枉於誨函惟心所期匪面烏既

賀余察推啟

計敏若

伏審疏檢宸廷贊條藩幕青天雲霧風景仰於英姿

綠水芙蓉暫淹留於逸少邦人胥慶僚友交歡恭惟  
察推朝議氣節凜然聲華籍甚淵源師友學已悟  
於聖傳波瀾老成文更追於古作回翔甚久恬養彌  
高眷大府之務繁籍元察之才敏紛綸殊狀孰逃照  
水之犀寥廓亨衢不礙冲霄之翼某猥充計掾獲附  
雋遊蔚乎相輝方仰翩翩之譽退然無用自憐碌碌  
之蹤

賀楊察推啟

虞元老

伏審宸廷錫命藩府贊條凡與見聞舉增欣抃恭惟  
某官襟靈凝遠器度端方得岷峨之秀為最多養  
江漢之源而有本身昔居於韋布學已務於經綸果  
以謹言親蒙睿擢今既同孫夢得用文辭而取甲科  
終必如范景仁聳風節以名天下自是朝廷之選寧  
容幕府之淹綠水紅蓮聊借途於鄉社青天白日行  
振翼於雲衢某比屬還轅幸承傾蓋衰遲何取猥見  
推同道之先緘翰遠貽更俯執下官之禮得見情文

之厚豈非聲氣之求

賀潘知錄啟

鄭伯厚

仰膺宸檢束紉邦聯遂忝同僚甚該公論伏惟某  
官端方器局練達材猷暫領就於郡曹行襟裾於省  
闈顧惟朽質獲覩清標未遑尺牘之修先辱駢函之  
貺

賀馮司理啟

熊子復

伏審大府簡僚高才作掾協贊專城之治允資折獄

之良先聲既傳公望咸屬恭惟 司理學士才資閱  
遠氣質靖深妙臻師友之淵源夙振文章之光艷自  
言挺出宜踐要津豈謂晚成見推大器嚮已淹於征  
筦茲猶試於理曹雖屈壯圖實階撫仕某猥縻郡稍  
獲比官聯方德庇之是依枉誨函之先逮銘感惟劇  
頌歎曷勝

賀陳司法啟

鄭子履

伏審顯膺異數榮領決曹留心丹筆之文振迹青雲

之路見聞所逮欣惟抃均恭惟 某官襟度坦夷器  
識宏遠秀毓珠星之間氣家傳玉几之遺芳刃恢恢  
而有餘事多多之益辦藩條小試試觀詳讞之功剡  
牘交飛行有薦揚之寵某棲遲薄宦偃蹇餘生莫承  
醞藉之風久費講聞之日濯纓而起自慙棲枳之香  
歛板而趨幸際詠梅之遜其為欣幸莫既敷陳

賀鄧司戶啟

陳阜卿

伏審擬自銓曹掾于潛府千里寔繁放版籍庸有贊

禪一時並萃於輩流卓為魁傑先聲所至公論皆歸  
恭惟 司戶學士與學根經懿文貫道爭鋒文陣已  
高掇於巍峩登軼仕塗宜大施於霹靂此殆哲人之  
細事亦非俗吏之能為編郭丹之事於黃堂庶為永  
式薦竇章之名於東觀即有新除某久矣仰高茲烏  
借潤顧未遑於馳牘迺先沐於飛函

賀許宰啟

陳仲思

光膺芝檢榮撫花封凡籍併蒙孰不抃蹈恭惟 某

官以大嶽之後繼箕山之高堂堂乎天下節義之閑  
皎皎乎屏間月旦之目詩成白也無敵筆落潮乎通  
神父子聯榮無歆向異同之論弟兄接武有機雲俊  
爽之才茲暫試於牛刀誠未展於驥足朝歌地隘器  
寧畏於蟠根彭澤春回門遂青於植柳膽遽寒於猾  
吏氣皆吐於良民政號神明手驚霹靂狗偷鼠切望  
風而斂迹者何多鴈集鳧趨開口而待哺者皆是陽  
春有脚冰鑑無私回千室以熙熙照羣心而凜凜諒



未溫席即膺名環某農圃遺民部封未士早受一經  
之訓妄希三釜之榮撫長鋏以興歌對短檠而自勵  
輒懷福刺進拜膺門雖桃李不言非有成蹊之意而  
燕雀相賀寧忘棲厦之心

賀張宰啟

張仲謨

嚴擇剏辰已諧視事輒憑柔翰用展賀儀惟豈弟之  
懷聞想吏民之增喜伏惟歡慶恭以 某官天資渾  
厚人品高明郡縣多所踐更名實加于上下承宣雷

地剏裁姑試於牛刀騰踏雲霄簡注行膺於鳳詔某  
切叨郡屬忝與宗盟披晤行軒既獲攄於傾嚮欣承  
交印得暫假於依棲瞻頌惟深軟宣罔既

賀李宰啟

林豈塵

桑梓相鄰未嘗有一日之雅草木同味將共事三載  
之間嗟幸會之何多慰平生之所願恭惟 判縣中  
大儼碩有立超邁不羣當從諸公衮衮臺省之榮肯  
隨俗吏區區州縣之職以治蒲治鄭治單父皆試其

才而曰宰曰尹曰大夫豈輕所任矧番禺號為劇邑  
於東南實倚名藩自皇祐以來隸籍凡三萬戶繇蕭  
政而後蒞官者二十人星辰已及於一周雷震不聞  
於百里吏懷狙狡而頑悍滋甚民雜蠻蜚而馴治愈  
難必須藉我公明斷之能然後革累年積習之弊蓋  
盤根可別利器存熟路宜駕輕車雙鳧正羨於喬仙  
一鶚當隨於彌薦某牽絲云始為米徒勞幸君子肯  
來與邑人而為喜且仇覽枳棘烏敢忘棲鳳之稱而

子游絃歌當與聞割雞之笑其為欣抃曷罄敷陳

賀袁宰啟

郭文紀

俯臨雷地已聽事於剏辰仰望雲天爰訴懷於桑翰  
下車甫爾騰頌翕然恭惟歡慶伏惟 某官醞籍天  
資淵源學海發策決科於桂籍授經傳道於芹宮姑  
試臨民製錦暫煩於牛刃行觀報政頒綸佇下於鳳  
函某下幕備員崇閱託芘嘗披承於芝宇馨歆獲聞  
阻趨造於花城譽依徒切

賀林宰啟

綦叔厚

伏審疏渥清朝承流鉅邑山川增爽共迎鳧鳥之臨  
風俗還淳暫屈牛刀之試恭惟 知縣朝議規摹閱  
遠醞藉醇深粹然家學之傳籍甚士流之仰才豪無  
敵一洗而凡馬空政妙有神四顧而全牛解某猥充  
郡幕獲比官寮都騎鼎來即遂披於樂霧雙魚寵及  
乃預拜於郇雲尺絨聊附於回翔寸抱第增於搖曳

賀孟宰啟

馮元通

雷地承宣濟恩威於此日雲天披靚慰想慕於平生  
吾道有光斯民何幸恭惟 某官天資醞藉學術淵  
源才華以取科名儒雅以飾吏治委蛇任路剴裁姑  
試於牛刀洋溢教聲拔擢行頒於鳳檢顧惟陋質曾  
際英標倥偬塵襟誠未修於尺牘并包德量貺先辱  
於駢緘

賀程宰啟

鄭伯厚

行臺被命望邑承流愷悌有聞吏民胥慶恭惟 某

官學優製錦道裕鳴絃政未及於下車民以深於引  
領屬茲式郡喜得賢僚未遑尺素之修先辱長緘之  
貺內惟覘愧仰認勞謙

賀戴丞啟

熊子復

伏以一行作吏緣飾皆儒雅之條再轉為丞殿最必  
清真之譽何先貽於尺牘庸少叙於寸懷恭惟  
丞正字僊韻邃清神標凝峙氣浩然而養之以直望  
儼然而即之也溫雖六月之鵬蚤上於搏扶而百里

之鸞棲於枳棘高才薦屈姑臨鴈鷺之行大器當升  
定遙駕鴻之侶拱而挨耳誰曰不然某猥以衰齡謬  
當劇邑薦書雖上許呈身集鳳之堂代者何遲尚絆  
迹飛鳧之舍敢嘆瓜期之度但欣樾蔭之依予不負  
丞丞負予君誠自謂我匪求蒙蒙求我僕願相資聲  
雖成文言莫盡意

賀詹丞啟

朱子淵

伏審調官銓曹貳令劇邑才尚淹於涉筆良鬱衆情

賦先枉於飛緘仰欽厚意恭惟 知丞朝議性質凝  
重心術疏明炳然翰墨之華籍甚搢紳之望回翔浸  
久緼藉彌優再轉為丞雖雄圖之少屈八命作牧諒  
華渥之方來某頃幸承顏茲辱貽翰貢小夫之牘少  
寓微誠依君子之察尚資餘芘

賀鄧丞啟

虞智周

種潘縣之花慙无妙手對崔庭之竹願託濃陰矧先  
十部之臨益重寸心之感恭惟 某官行方以峻德

粹而溫景星鳳凰衆皆覩渾金璞玉世莫能名友士  
尚論古人用儒以飾吏事先聲所重豈惟清鴈鷺之  
行精意潛通端可息風濤之害涉筆占位難淹於大  
手聳壘昂霄何礙於橫飛不待突黔即膺泥紫某尸  
官碌碌慕義拳拳願識面於荊州喜同僚於士會亶  
為際遇將事從容丞負予予負丞佇看搢紳之美子  
生孫孫生子永為仕契之榮

賀張主簿啟

元子俊

一行作吏備員方愧於哦松貳政得賢庇職獲聯於  
棲枳車塵在望私分自榮台命寵光感悰增懼恭惟  
某官學博以約德粹而溫翠竹碧梧外想威容之  
閑雅青天白日中涵氣質之清明盍攄經濟之才姑  
領勾稽之職暫閱簿書之冗勉從會計之勞蓋將託  
宿於蘧廬行且騰芳於楓陛謂百里豈大賢之路吾  
嘗聞之被十行皆細書之文子其然矣某叨塵末路  
濫吹負丞初考已書寸功无補徒有惡中之愧曾无

善後之圖同舟而无異心庶幾同濟會績而借餘燭  
更賴分光

賀沈尉啟

趙德莊

伏審擬自銓曹掾于巖邑協佐鳴絃之化式資綵捧  
之威先聲既傳公議允屬恭惟 仙尉學士根經種  
學貫道締章中蘊氣以浩然外騰聲而藉甚盍即登  
於儒館猶須試於尉曹吏隱吳門尚晦子真之德盜  
奔晉國已收士會之功某猥服冷曹嘗歎英槩欣尚

依於華蔭愧預枉於珍函

賀魏尉啟

張守真

山城攝事滿懷三斗之塵函使將勤有寵雙魚之貺  
於德固謙矣斯心其謂何恭惟某官韻宇儲崧彌  
文倒峽刃游餘地翩翩信公子之佳吏隱仙官鬱鬱  
豈此居之久佇膺奏最式大前修某伎止於斯老之  
將至云胡不喜得平生欠識之人惠然肯來賴王事  
同寅之助所藏胸次未竟毫端

賀李監鎮啟

陳師禹

伏審涓選剛辰典司清職動歡聲於井陌回爽氣於  
西山恭惟知鎮朝議僊韻冲深神機凝靜藏之以  
待如白璧明珠之珍扣之則鳴若黃鍾大呂之韻粹  
然家學籍甚時名暫煩闕市之征壯圖尚屈行被廟  
堂之擢異渥方來進任中朝用光先正某猥居郡幕  
獲比官聯昨預拜於郇雲茲入披於樂霧甚慰仰高  
之久良欣借潤之多倍激卑悰式殫危悃

賀李監場啟

程子光

祇膺綸渙分典貨源進用所階流聞相慶恭惟某  
官家傳素業行蹈清規久參幕府之游積有公朝之  
譽維茲新命定視中都使八政之允修內能富國則  
三軍之素飽外足強邊選任匪輕褒嘉可待某風期  
自昔問訊未遑拜藻翰以甚榮撫懦衷而增愧

賀孔監場啟

史唐老

伏審光奉茂恩肅司清職才尚淹於莞庫良鬱衆情

貺先枉於緘滕仰欽厚意恭惟 監場朝奉受才傑  
異造理精微大族本於中州華胄出於先聖粹然家  
學籍甚時名雖暫屈於壯圖諒即膺於異擢某自憐  
碌碌殊愧翩翩依君子之僚尚資餘比貢小夫之牘  
少寓微誠

賀翁監酒啟

胡文饒

平生仰德常馳引領之情今日依仁幸有盍簪之契  
承顏伊邇撫已增榮恭惟 某官食德慶門飛聲仕



路神助孟觥之句知醞藉之有餘爾惟麴蘖之才或  
施設之可卜暫勞心計即以最聞公家之利无不為  
日既富矣賢能之舉不待次行將見之某粗知讀書  
不習為吏半生牢落技何取於穿揚一第間闕仕偶  
沾於棲棘不圖際會獲有依承矧惟託宿之居密邇  
移封之地簿書餘暇敢忘請益之勤樽酒相從當奉  
論交之款

賀游監稅啟

王子禮

瞻風滋久預懷傾蓋之城卜日鼎來行有盍簪之契  
其為厚幸實倍常情恭惟 某官德蘊中和氣全剛  
大涵養廟堂之用淹回關市之征貨財所積以如山  
商賈願歸於其市暫勞心計即以最聞膠鬲或起於  
漁鹽當從此始文子不輕於筦庫必舉所知某粗知  
讀書不習為吏凡錢穀米鹽之事未嘗過而問焉今  
簿書期會之勞乃由此其選也尚虞狂斐或致曠穰  
有以利吾國乎已卜其鄰之富友其士之仁者幸分

我燭之光

賀韓統制啟

范東叔

欽奉詔書進褒師律直上聞之嚴近為中壘之光華  
恭惟 某官才雄萬夫身履百戰稟山西之氣膺閩  
寄於九重破歷下之軍績家聲於千古果埽妖氛之  
暴亟升勇爵之崇某久仰戎輅况依鄰寶贊喜未遑  
於奉記披誠首辱於騰牋徒積感銘敷宣曷既

賀曹路分啟

徐南仲

長劍倚空壯矣平生之志高牙啟道重言指日之迎  
未詹燕額之竒姿有寵鵝經之妙墨光生暮齒庇託  
餘陰恭惟 某官千里折衝一身是膽矯矯戎昭之  
義英英武緯之雄騰馳銅柱之名暫屈金華之地蛟  
龍得雲雨詎聞鬱鬱之居蟬貂出兜鍪拭日津津之  
喜某叨丞一障幸歷三時居聞騎氣之來殊激懦衷  
之立顧橫槊賦詩之逸可得而聞使磨鉛舐墨之流  
亦足以發

聖宋名賢五百家播芳大全文粹卷六十四終

